

Warga Kemboja kuasai pasaran ikan

UM 25/7/2022 MS: 30

Oleh **SAYED HESHAM IDRIS**
utusannews@mediamulia.com.my

PARIT: Penternak ikan dalam sangkar Sungai Perak sekitar daerah Perak Tengah terutama di Parit, tertekan dengan kehadiran semakin ramai warga asing dari Kemboja yang menternak dan menguasai pasaran ikan air tawar daerah ini.

Bercakap kepada *Utusan Malaysia*, seorang penternak ikan yang enggan namanya disiarkan berkata, warga Kemboja yang tinggal menyewa rumah penduduk di beberapa buah kampung di sini, mengusahakan ternakan ikan sangkar seperti patin, tilapia dan baung.

Katanya, kegiatan itu sebenarnya sudah lama bermula namun penguasaan mereka kian ketara sejak kebelakangan ini apabila semakin ramai warga Kemboja tinggal di situ.

Katanya, penternak warga Kemboja berupaya menawarkan harga ikan lebih rendah kerana dapat menjimatkan kos disebabkan operasi yang tidak mengikut syarat ditetapkan dengan cara memberi ikan makan perut ayam berbanding penternak tempatan menggunakan pallet.

“Penggunaan perut ayam se-



SANGKAR ternakan ikan yang diusahakan warga Kemboja di Sungai Perak ketika tinjauan di Parit, baru-baru ini. - UTUSAN/AIN SAFRE BIDIN

bagai makanan ikan membolehkan mereka jimatkan kos, tetapi ini menyebabkan pencemaran sungai dan bau yang busuk.

“Dengan cara itu, mereka boleh menjual ikan pada harga rendah contohnya ikan patin

RM15 sekilogram oleh penternak tempatan tapi mereka jual serendah RM11 sekilogram.

“Malah mereka pernah ‘pancung’ pelanggan saya dari Temerloh kerana menawarkan harga ikan yang lebih rendah

berbanding yang saya tawarkan,” katanya.

Menurutnya, warga Kemboja tinggal di beberapa buah kampung di sini dan menjalankan ternakan ikan sangkar antaranya di Kampung Bidara, Bukit

Chupak, Padang Kangar, Tanjung Dedalu, Sadang, Kampung Selboh, Kampung Tengah malah hingga di Kampung Mandah di Daerah Kuala Kangsar.

Katanya, mereka menguasai pasaran ikan di pasar-pasar daerah ini termasuk di Parit, Seri Iskandar, Bota dan hingga ke luar Perak.

Katanya, kehadiran warga Kemboja semakin bertambah sejak kebelakangan ini dan kian ghairah mencari kekayaan dengan menternak ikan sangkar.

Jelasnya, mereka menyewa rumah penduduk kampung di tepi sungai dan memujuk pemilik tanah untuk membenarkan mereka mengusahakan ternakan ikan sangkar di sungai.

“Pada awalnya mereka datang tidak ramai dan mengusahakan ternakan ikan sangkar. Apabila keadaan aman damai, maksudnya tiada sebarang operasi pihak berkuasa terhadap mereka sebagai rakyat asing, mereka mengajak saudara mara dan rakan-rakan di kampung mereka di Kemboja untuk bekerja dengan mereka.

“Mereka yang datang ini masuk ke negara ini sebagai pelancong, bukan sebagai pekerja,” katanya.

Kumpul kekayaan, beli tanah hasil ternak ikan dalam sangkar

PARIT: Selain menguasai pasaran ikan air tawar di Perak Tengah, penduduk tempatan bimbang warga Kemboja mengambil kesempatan membeli tanah penduduk kerana mereka mempunyai wang yang banyak hasil ternakan ikan di Sungai Perak.

Seorang penduduk tempatan yang enggan namanya disiarkan berkata, tidak diketahui secara jelas sama ada terdapat tanah penduduk yang telah dibeli oleh warga Kemboja namun apa yang menjadi kemusyikilan adalah ada warga Kemboja di sini yang dilihat membina rumah.

Katanya, jika tanah yang diduduki mereka tidak dibeli atau hanya menyewa, bagaimana warga asing itu boleh membina rumah.

“Memang ada orang berasal dari Kemboja yang mempunyai

kad pengenalan setelah berkahwin dengan rakyat tempatan dan membeli tanah serta membina rumah hasil daripada ternakan ikan sangkar yang mereka jalankan.

“Namun ada juga warga Kemboja di sini yang apabila ditanya, mereka kata mereka cuma menyewa rumah penduduk tetapi saya lihat mereka membina rumah baharu. Malahan siap di pasang pagar lagi. Jika cuma menyewa mengapa hendak bina rumah?”

“Inilah yang membimbangkan kami yang jika dibiarkan mungkin ada tanah dibeli oleh orang asing kerana mereka banyak duit hasil pekerjaan menternak ikan sangkar, boleh beli apa saja,” katanya kepada *Utusan Malaysia*.

Menurutnya, diakui warga Kemboja mempunyai wang

yang banyak hasil daripada aktiviti ternakan ikan sangkar selain menjual sayur kepada penduduk di kampung-kampung menaiki motosikal.

Katanya, dengan kemampuan kewangan yang mereka miliki, mereka boleh membeli tanah lebih tinggi daripada yang ditawarkan oleh penduduk tempatan.

“Sudah ada mereka yang asalnya warga Kemboja namun mempunyai kad pengenalan membeli tanah dan membina rumah besar. Mereka juga mampu membeli kereta secara tunai, juga memiliki lori untuk menghantar ikan kepada pembeli,” katanya.

Menurutnya, kehadiran warga Kemboja di sini tidak seperti warga asing yang lain seperti warga Indonesia yang datang hanya untuk bekerja.